

Cynyddu nifer y bobl sy'n cael mynd i dderbyniadau priodas

Y Pwyllgor Deisebau | 01 Rhagfyr 2020
Petitions Committee | 01 December 2020

Cyfeirnod: RS20/14570-6

Rhif y ddeiseb: P-05-1057

Teitl y ddeiseb: Cynyddu nifer y bobl sy'n cael mynd i dderbyniadau priodas.

Geiriad y ddeiseb: Mae gennym briodas wedi'i chynllunio ar gyfer diwedd mis Hydref, ond ar hyn o bryd ni allwn gael derbyniad i ddilyn gyda'n gwesteion i gyd. Gallem gael pryd o fwyd mewn bwyty ond nid 'derbyniad'.

Ar hyn o bryd mae Gogledd Iwerddon yn caniatáu i leoliadau gyfyngu ar y niferoedd ar sail maint y lleoliad a chadw pellter cymdeithasol diogel. Hoffem weld hyn yn cael ei gyflwyno yng Nghymru. Byddai hyn yn sicrhau cydraddoldeb rhwng y diwydiant bwytai / tafarndai a'r diwydiant priodasau.

Mae'r rheoliadau presennol a diffyg amserlen wrth symud ymlaen wedi gadael cannoedd o gyplau mewn cyflwr o ansicrwydd a dan bwysau sylweddol yn ystod cyfnod a ddylai fod yr hapusaf yn eu bywydau.



1. Cefndir

Ar 23 Mawrth 2020, er mwyn atal lledaeniad y coronafeirws, cyflwynwyd cyfyngiadau ar ymgynnull a symud, ynghyd â chau busnesau nad ydynt yn hanfodol. Ymhlith y manau yr oedd angen eu cau roedd addoldai, cofrestrfeydd, lleoliadau priodas a busnesau lletygarwch. Yn sgil hyn, cafodd yr holl briodasau a seremonïau partneriaeth sifil eu gohirio neu eu canslo.

Ar ddechrau mis Mehefin 2020, cyhoeddodd Prif Weinidog Cymru [y byddai rhai o'r cyfyngiadau cyntaf yn cael eu llacio yng Nghymru](#), ond nid oedd hyn yn ymestyn i gynnwys priodasau a seremonïau partneriaeth sifil. Yr unig eithriad i'r cyfyngiad oedd pan oedd un rhan o'r cwpl yn angheuol wael.

Wrth i nifer yr achosion leihau dros amser, cyhoeddwyd rhagor o fesurau i lacio'r cyfyngiadau yn raddol. Ganol mis Mehefin 2020, caniatwyd i addoldai a chofrestrfeydd gynnal seremonïau unwaith eto, [fel yr adroddwyd yn yr erthygl newyddion hon ar BBC Wales](#). Fodd bynnag, nid oedd hyn yn ymestyn i dderbyniadau priodasau a phartneriaethau sifil. Gwnaed diwygiadau pellach i'r [rheoliadau ar 21 Awst](#) (sydd wedi'u dirymu bellach), a oedd yn caniatáu i hyd at [30 o bobl fynychu derbyniad](#) i ddathlu gweinyddiad priodas neu bartneriaeth sifil mewn adeilad rheoledig. Roedd y terfyn o 30 yn berthnasol ar y pryd i dderbyniadau a gynhelir dan do neu'r tu allan.

Yn ystod mis Medi a mis Hydref 2020, gorfodwyd sawl cyfnod o gyfyngiadau symud lleol mewn ardaloedd yng Nghymru. Roedd y rheoliadau yn gosod cyfyngiadau penodol ar symud ac ymgynnull, er bod teithio i mewn neu allan o [ardal diogelu iechyd leol](#) i fynd i [weinyddiad](#) priodas neu bartneriaeth sifil yn dal i gael ei ystyried yn esgus rhesymol. Ar y pryd, caniatwyd derbyniadau hefyd, ond roedd rhaid i [bob gwestai](#) mewn derbyniad priodas fyw yn yr ardal diogelu iechyd.

Ar [19 Hydref 2020](#), cyhoeddodd y Prif Weinidog y byddai Cymru yn dechrau ar gyfnod atal byr am bythefnos. Gosododd [Rheoliadau Diogelu Iechyd \(Cyfyngiadau Coronafeirws\) \(Rhif 3\) \(Cymru\) 2020](#) (bellach wedi'u dirymu) gyfyngiadau newydd ar symud ac ymgynnull. Caniatwyd mynychu gweinyddiad priodas neu ffurfio partneriaeth sifil yn ystod y cyfnod atal byr, ond gwaharddwyd derbyniadau neu ddathliadau yn dilyn y seremoni.

Cyflwynwyd set newydd o reolau a chanllawiau cenedlaethol ar [9 Tachwedd 2020](#).

2. Camau gweithredu Llywodraeth Cymru

Y rheolau ar gynnal derbyniadau priodas

Mae rhan 2 Rheoliadau Diogelu Iechyd (Cyfyngiadau Coronafeirws) (Rhif 4) (Cymru) 2020 (fel y'u diwygiwyd) yn gosod cyfyngiadau ar gyfarfod â phobl eraill (y cyfeirir ato fel "cymryd rhan mewn cynullïadau") ac ar ddigwyddiadau.

Mae rheoliad 4 yn cyfyngu ar gynullïadau yng nghartrefi pobl i ddim ond y rheini sy'n rhan o aelwyd estynedig (neu "swigen"). Mae rheoliad 6 yn dweud y gall nifer gyfyngedig o bobl (4 o bobl ac eithrio plant o dan 11 oed) o wahanol aelwydydd gyfarfod i ffwrdd o gartrefi pobl. Fodd bynnag, mae rhai eithriadau penodol i'r rheolau hyn lle bo'n rhesymol angenrheidiol ymgynnull ac nad oes dewis arall sy'n rhesymol ymarferol.

Mae eithriadau yn cynnwys gweithgareddau penodol "wedi eu trefnu" sy'n cynnwys hyd at 15 o bobl sy'n cyfarfod o dan do a 30 o bobl sy'n cyfarfod yn yr awyr agored. Darperir enghreifftiau o'r hyn a allai fod yn eithriadau ar gyfer cynullïad o dan Rheoliad 6(5). Un eithriad o'r fath yn y Rheoliadau yw caniatáu i nifer gyfyngedig o bobl ymgynnull i fynd i dderbyniad i ddathlu priodas neu bartneriaeth sifil.

Mae rheoliad 6(6)(e) yn gwneud eithriadau ar gyfer:

- cymryd rhan mewn cynullïad o **ddim mwy na 15 o bobl**, heb gynnwys personau o dan 11 oed, mewn mangre reoleiddiedig i—
 - (i) dathlu gweinyddiad priodas neu ffurfiad partneriaeth sifil sy'n digwydd ar neu ar ôl 22 Awst 2020.

Y canllawiau

Gellir cynnal derbyniad priodas neu bartneriaeth sifil ar gyfer hyd at 15 o bobl mewn adeilad rheoledig (fel tafarndai, bwytai, gwestai neu ganolfannau cymunedol), cyhyd â bod 'pob mesur rhesymol' yn cael ei gymryd i leihau'r risg o ledaenu'r coronafeirws. Bydd hyn yn cynnwys cyfyngiadau ar y math o weithgarwch a all ddigwydd – er enghraifft ni ddylid chwarae cerddoriaeth uchel, a dylid gweini unrhyw fwyd wrth y bwrdd yn hytrach na bwffe. Nid yw'r terfyn ar y rhai a all fod yn bresennol yn cynnwys plant dan 11 oed na staff sy'n gweithio yn y digwyddiad.

Dywed canllawiau Llywodraeth Cymru ar y rheolau cenedlaethol:

Caiff uchafswm o 15 o bobl fynychu derbyniad priodas neu bartneriaeth sifil neu wylnos ar ôl angladd, cyn belled â bod hyn yn digwydd mewn safle a reoleiddir. Mae nifer y bobl sy'n gallu mynychu angladd neu seremoni priodas neu bartneriaeth sifil yn dibynnu ar y safle y mae'n digwydd ynddo.

Gellir dod o hyd i wybodaeth am y rheolau ar gyfer cynnal derbyniadau priodas ar gyfer safleoedd ar reoleiddir yn y [canllawiau ar gynnal derbyniadau priodas](#).

Er bod cynnal derbyniadau mewn safle a reoleiddir wedi'i ragnodi yn ôl y gyfraith, mae yna reoliad hefyd sy'n darparu ar gyfer cynnal a mynychu digwyddiadau awyr agored. Mae Rheoliad 6(6)(j) o'r [Rheoliadau Diogelu Iechyd \(Cyfyngiadau Coronafeirws\) \(Rhif 4\) \(Cymru\) 2020](#) (fel y'u diwygiwyd) yn gwneud darpariaeth i bobl gymryd rhan mewn **gweithgaredd wedi ei drefnu yn yr awyr agored** neu hwyluso'r gweithgaredd hwnnw lle nad yw mwy na 30 o bobl yn bresennol. Nid yw'r ffigur hwn yn cynnwys plant dan 11 oed, ac ni ellir yfed unrhyw alcohol mewn digwyddiad o'r fath.

Er nad yw'r rheoliad yn cyfeirio'n benodol at dderbyniadau priodas neu bartneriaeth sifil, mae [Canllawiau i awdurdodau lleol, safleoedd cymeradwy a mannau addoli ar briodasau a phartneriaethau sifil: coronafeirws](#) Llywodraeth Cymru yn nodi:

Caniateir derbyniadau priodas gyda hyd at 15 o bobl yn bresennol o dan do a hyd a 30 o bobl mewn digwyddiad wedi'i drefnu yn yr awyr agored. Mae hawl i yfed alcohol fel rhan o ddatliad dan do os yw hyn yn rhan o bryd cylllell a fforc.

3. Camau gweithredu'r Senedd

Mae Pwyllgor Deisebau'r Senedd eisoes wedi trafod [deiseb yn galw am ganiatáu priodasau yn ystod y cyfyngiadau symud cenedlaethol cyntaf](#). Cyflwynwyd y ddeiseb hon cyn y caniatwyd i seremonïau priodas fynd yn eu blaen, ac nid oedd yn ymwneud â derbyniadau priodas.

Ar 23 Medi 2020, gofynnodd [Mark Isherwood AS](#) mewn cwestiwn ysgrifenedig i'r [Gweinidogion](#) a oedd gan Lywodraeth Cymru 'unrhyw gynlluniau yn y dyfodol agos i leihau'r nifer fwyaf a gaiff fynd i dderbyniadau priodas o 30 i 15 o bobl fel yn Lloegr?'. Yn ei hymateb, dywedodd Llywodraeth Cymru:

We have no current plans to amend the 30 person limit for wedding receptions. We will continue to keep the position under review but at present, there is no substantive evidence that weddings and receptions have been the source of significant transmission.

Ar **3 Tachwedd 2020 mewn datganiad llafar yn y Cyfarfod Llawn** cadarnhaodd y Prif Weinidog:

Fe fydd eithriad ar wahân ar gyfer hyd at 15 o bobl i allu bod yn bresennol mewn gwledd briodas neu bartneriaeth sifil neu de angladd, ac ni fydd plant dan 11 oed yn cael eu cyfrif yn rhan o'r cyfyngiadau ar gwrdd ag eraill yn y lleoliadau rheoledig hyn.

Gwneir pob ymdrech i sicrhau bod y wybodaeth yn y papur briffio hwn yn gywir adeg ei gyhoeddi. Dylai darllenwyr fod yn ymwybodol nad yw'r briffiau hyn o reidrwydd yn cael eu diweddarau na'u diwygio fel arall i adlewyrchu newidiadau dilynol.